

EcoGas tin 1 siman pa haci sitio di dump ilegal limpi

ORANJESTAD – Recientemente e departamentonan DNM, DIP, DOW y BCI a sali pa atende cu un otro dump ilegal cu mas y mas tabata haya atencion den comunidad.

Den cuadro pa elimina varios dump ilegal na Aruba, e departamento na aki a bay na e sitio net patras di Ecogas, na unda cu e resto di sushi cu nan ta empakta den e bales, ta wordo benta riba e sitio aki sin un solucion y nan a bay pa evalua e situacion aki.

Segun e comunicado cu Bon Dia Aruba a ricibi, Gobierno a manda un carta pa e compania cu ta deposita e sushi ilegalmente riba e sitio aki, den cual a indica entre otro cu nan tin 1 siman pa haci full e sitio aki limpi. Si nan no haci esaki, lo core consecuencia cu nan por ricibi un boet enorme y varios otro medida por bin na remarke.

Director di City Inspectors Kevin Peterson a splica cu BCI a wordo poni na altura di un dump ilegal tumando luga riba tereno patras di Ecogas. Consecuentemente, diahuebs conhuntamente cu DNM, DOW y DIP a bay controla e tereno y constata cu berdad e ta hopi sushi. Locual por a mira ta e restonan di sushi cu ta wordo verwerk door di e compania Ecogas ta wordo deposita ilegalmente riba e tereno. E compania a wordo poni na altura cu nan tin 1 siman pa haci e sitio limpi.

Manera cu ta conoci BCI ta efectua diferente control diariamente na bienestar di Pais Aruba y como parti di esaki ta percura pa 'cera' tur dump ilegal. E compania a confirma di a ricibi e carta di Gobierno y a duna di conoce cu nan lo percura pa e limpieza tuma luga dentro di e 1 siman. Si no ta haci esaki, sr. Peterson a termina bisando cu BCI lo bolbe na e sitio conhuntamente cu DNM cu lo actua y e compania lo por haya multa pa e accion aki.

